

## IYIZIRE NKINDI

Ndasiga nsanga musanabera  
Misaya isenye inasigirije  
Uw'inseko isumba imisemeko  
Simbi nsingiza nsinzira  
Simusibye imboni murota !

Naramurebye nabiramutse  
Anyereka imanzi zuje umubiri,  
Mbonye izo mbavu zambaye imbugu  
Nsuma nsingiza inseko asengwa  
Nti : „Uri umwari umwe wazinyoye,  
Uri nzobe nziza izira ikizinga  
Saro risumbya izuba kwaka !”

Iyo arimo atera twa dutambwe  
Atamba nk'isirabo y'isine  
Kumwirorera bisa no kubaho :  
„Aba asa n'isimbi ryoga inyanja  
Cyangwa inyange iri mu nyambol!...”

Imana imurema yarariraye  
Birayizindura ibizirikana  
Ngo ize imutake uko itekereza ;  
Itanaze intango iyihaza intamyi  
Umuhiro wa mbere w'agatango  
Uramutamaza agitangaza !

Yaramutatse iva ku kirenge  
Irora imirundi irasigiriza  
Intege izitambagiza nyamuraza  
Igeze ku matako ibigira akarusho,  
Inoza mu mayasha n'urukenyenerero,  
Iyo mu gituzi iharema ituje,  
Maze uruhanga rwo irarukanika  
Indahangarwa ntiruzihanga !...

Iyo arimo atendeza ingohe nk'inka  
Bituma atera ipfa utamutunze !

Niko se nkindi nkesha iyi nseko:  
Nk'iri hirwe ndishimire nde  
Ryo kugutunga uri umutako  
Kandi utambutse imitako ?

Narakubonye ubwo nahitagamo  
Nkurora uhanganye n'abeza  
Ubasiga unsanga ; ndoye nshishoje,  
Nsanga ubaruta ubutavuguruzwa !

Ubarusha izuba rirashe neza  
Ubarusha insereko n'inseko nziza  
Ubarusha amatako atemba inshyushyu  
N'amaribori yakumaze intege !  
Ubarusha byose ufite umukunzi !  
Urabaruta koko tetero ry'abato !  
Abatesi bose ubavamo ugatona !...

Disi bwiza budashira irora:  
Ko wampesheje ishema henshi  
Ugatuma nsangwa nkanisanga  
Uwanyuze imfura se nguhongere iki ?

Akira iraba ryo kugutaka  
Shenge mbyeyi nshinze ibyange ;

Ndaguha sine ngo ijye igukamirwa  
Uri ku ruhimbi, uvuza uruhindu...

Nzagushora aho amariba afutse  
Nguhe uruteja rwuje itoto ;

Nzaguhimba inka zivumere  
Inyoni iritanye nkikuririmba ;

Nzaguhungana impyisi ihumye  
Intare niyivuga nyivuguruze  
Uruvu rurinde ubwo ruvugiriza  
Nkivundagura abakuvuga bibi !

Nzagusiga imisambi ihige  
Maze nkurambagirane wera  
Urore imirambi imwe irambuye  
Ntinarambire abayireba ;

Imisozi isiye uzayisura  
Uyigere impinga urore amataba ;

Nzakurambagirana hose  
Turore n'ibyeramasimbi ...

Nzakurinda umwanzi ukwanga  
Mureke arengane n'irirenga ;

Nzagukunda ngushyire igorora  
Maze abakunzi bazizihirwe  
Abanzi bijinye tubareba !

Nzagutaka naragutoye  
Amakara y'umuko nyarage uwawe ;

Nzagusiga ubarizweho isuku  
Ibiberu nzezaho bibe ibyawu.

Iyizire nkindi undinde intimba ;

Iyizire nguhoze hogoza ryanjye  
Twikomereze umunezero;

Iyizire utuze erega urakunzwe !